

Txirritola

ARAMAIO / Barikua / 2003ko uztailaren 18a / 73. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Hitzaldiak, txangoa eta bazkaria antolatu dituzte aurtengo Erretiratuaren Asterako

U.M.

Astelehenean hasi eta zapatu-
ra arte ospatuko dute aurtengo
Erretiratuaren Kultura Astea
aramaiarrek. Hitzaldiak,
txangoa eta bazkaria izango
dituzte, besteak beste. Herriko
erretiratuari, alargunei eta
pentsiodunei zuzendutako
ekimenak dira.

Hitzaldiekin hasiko dute aurtengo
Erretiratuaren Kultura Astea.
Astelehenean (hilak 21), 18:00etan,
izango da lehenengoa, kultura
etxean. Udaleko gizarte laguntzaile
Susana Martínez izango da
hizlaria.

Martitzenean, berriz, Aramaioko
mediku Javier Españak beste hitzaldi
bat egingo du. Hori ere 18:00etan
hasiko da, kultura
etxean.

TXANGO KULTURALA

Horrez gainera, eguenean txango
kulturala antolatu dute. Goizean,
10:00etan irtengo da autobusa,
eskolatik; eta Gasteizko Artium
museoa ikustera joango dira
lehenengo. Horren ostean,
beste museo bat ikusiko dute,
ardoaren gainekoa, oraingo



Besteak beste, pertsona nagusiak horrenbeste kezkatzen dituen osasunaren gaineko berbaldia izango da Kultura Astea.

honetan: Laguardia y Sios museo-
a, hain zuzen ere. Eta, bukatzeko,
txangoan parte hartzen dutenek
bazkaria egingo dute Marisa
jatetxean.

BAZKARIA ETA OPARIAK

Eta zapatua Kultura Astearen
amaiera eguna izango da. Meza
entzango dute lehenengo,
13:00etan. Eta gero, 14:00etan baz-

karia izango dute. Bazkalostean
opariak banatuko dizkiete parte-
hartzaileei.

Urtero moduan, Alaiak elkar-
teak antolatu du Kultura Astea.

*Hizlari bi daude:
astelehenean, Gizarte
Laguntzailea; eta
martitzenean,
medikua*

*Eguenean txangoa
egingo dute: Artium
museora eta
Guardiako Ardoaren
Museora*

*Bukatzeko,
barikuan meza eta
bazkaria izango
dituzte; baita
opariak ere*

Gazte lokalak berriro ere zabaltzea erabaki dute

U.M.


Berriro ere zabalduko dituzte
kultura etxeko gazte lokalak.
Hala erabaki zuten joan den
asteko osoko bilkuran. Hori
bai, lehenik eta behin gazteek
lokalak garbitu, margotu eta
konpondu egin beharko
dituzte. Eta, proba moduan, sei
hilabeterako utziko dizkiete.

Erabaki horiek hartu zituen udal-
batzarrak azkeneko batzarrean.
Erabaki zuten, baita ere, 14 urte-
tik 20 urtera arteko muga ipintzea
gazte lokalak sartzeko. Hain
zuzen, puntu horrek izan zuten
eztabaidarik handiena; zenbait
zinegotzik ez zuten-eta argi ikus-
ten gazteen adin muga 20 urtera
arte zabaltzea; 18 urtera artekoa

izatea gurago zuten.

Kontuak kontu, lehen aipatu-
tako moduan, udalbatzarrak gazte
lokalak berriro zabaltzea erabaki
du, betiere baldintzapean. Hala,
zabaltu baino lehen, lokalok gar-
bitu egin beharko dituzte, eta gaz-
teek sartutako altzarrietako batzuk
kanpora atera (zinegotzien ustez
egoera eskasean daudelako). Apur-
tutakoak (sarraila eta leihoa, adi-
bidez) konpondu egin beharko
dituzte, eta hormak margotu (gaz-
teen kontura). Era berean, lanpa-
rak eta fluoreszenteak ez tapatzea
eskatuko diete gazteei, horiek su
hartzeko duen arriskuarengatik.
Eta, hasteko, sei hilabeterako utzi-
ko dizkiete lokalak, proba moduan.

Dena dela, orain gazteekin ber-
ba egin beharko dute ea haiek
ados dauden erabakitakoarekin.



Noizean behin gazte lokalen egoera ikustera joango dira Udaleko ordezkariak.

LABUR

Oraingo asteburuan hasiko da udako zinema

Oraingo asteburuan hasi eta
irailera arte (iraila barne),
zinema emango dute zapatu-
ro. Udako zinemaren denbor-
aldia da. Hala, oraingo zapatu-
tuan *Mortadelo y Filemón* fil-
ma emango dute, 22:00etan,
kultura etxean. Berez, udako
zinema kanpoan emateko da,
eta bestetan hala egin izan
dute. Baina orain arte erabi-
li izan dituzten lekuak oso
egokiak ez direla-eta, erabaki
dute oraingo kultura etxean
ematea. Aurrera begira, pla-
zan eman gura dituzte filmak,
baina argindarra-eta egokitu
beharra dute horretarako.

TELEFONO JAKINGARRIAK

OSASUNA / LARRIALDIK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zulako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

UDA IKASTAROEN LIBURUAK

Uda ikastaroek izan duten arrakasta ikusita, antolatuak erabaki dute ikastaroetan egindako hitzaldiekin eta galderarantzunekin liburu bana kaleratzea. Hala, iazko ikastaroen gaineko liburua abendurako plazaratzeko asmoa dute. Berriz, aurtengo ikastaroen gainekoa urtarrilerako argitaratu gura dute, aurreikuspenen arabera. Gogoratu dezagun, *iaz Europako hizkuntzak, lehen eta orain* izeneko ikastaroa egin zutela; eta aurtun, *Euskal Herria eta inguruko lurraldeak, I-X. mendeak* izeneko.

IRAILEKO ORDUTEGIA

Erabaki dute irailean zelan jardungo duten lanean kultura etxeko KZGunean. Hala, irailean 1etik 16ra arte, 16:00etatik 20:00etara izango da zabalik; eta 17tik 30era, 09:00etatik 13:00etara. Gogoratu ezazue KZGunean izena eman nahi izanez gero, Udaletxera jo behar dela. Bestalde, argibideren bat-edo behar duenak, KZGuneko telefonora deitu dezake. Honako hauxe da: 945 44 54 36.

Ikasliburuak erosteko dirulaguntza emango dute

UBANE MADERA

2003-2004 ikasturterako ikasliburuak erosteko dirulaguntzak eska daitezke. Haur Hezkuntzako bigarren zikloko eta Lehen Hezkuntzako eta Derrigorrezko Bigarren Hezkuntzako edozein mailatan matrikulatuta dauden ikasleendako dira laguntzak. Urriaren 15a baino lehen eskatu behar dira.

Guraso baten baino gehiagoren estuasuna izaten da ikasturtero seme-alabei ikasliburuak erosi behar izatea; diru-gastu handia egin behar izaten dute-eta. Horri aurre egiteko aukeretako bat bigarren eskuko liburuak eskuratzea izaten da; eta beste aukera bat Foru Aldundiak eskaintzen dituen dirulaguntzak eskatzea.

ZEINEK ESKATU DEZAKE

Honako hauek eska ditzakete laguntzak: Haur Hezkuntzako bigarren zikloan edo Lehen Hezkuntzako edo Derrigorrezko Bigarren Hezkuntzako edozein mailatan matrikulatuta dagoen edozein ikasleren gurasoek edo

tutoreek. Betiere, Araban errolatuta badaude, jakina.

AURKEZTU BEHARREKOAK

Dirulaguntzak eskatzeko honako dokumentu hauek aurkeztu behar dira: laguntza eskaera (Diputazioaren inprimakia); eskatzailearen nortasun agiria edo pasaporte; familia liburuaren fotokopia; ikaslearen erroldatze zedula, 2003an eguneratua; ikaslearen 2003-2004 ikasturteko matrikularen ordainagiria edo matrikulatze egiaztagiria; eta erosi beharreko liburuen faktura originalak (fakturan, gutxienez, eskatzailearen izena, liburuaren izenburua eta prezioa adierazi behar dira). Esan beharra dago, baita ere, eskaera bakarra aurkeztu behar dela. Nahiz eta familian ikasle bat baino gehiago izan.

URRIAREN 15ERA ARTE

Dagoeneko eska daitezke dirulaguntzak. Oraingo martitzenean (hilak 15) zabaldu dute epea. Urriaren 15a baino lehen aurkeztu behar dira eskariak. Diputazioko Ogasun, Finantza eta Aurrekontu Sailak Gasteizko Samaniego kaleko 14. zenbakiko bulegoan.



Arexola-Arriolan Santa Marina jaiak asteburuan

Oraingo honetan, Arexola-Arriolan egongo da jai giroa, barikuan hasi eta domekara arte. 20:30ean hasiko dira jaiak etxafuegoekin eta kanpai errepikarekin. Meza ere izango da 20:30ean, Santa Marinaran. Eta horren ostean, 21:00etan, auzokoendako bertso-afaria izango da, herriko trikitilariak lagunduta.

Zapatuan meza izango da, 12:00etan. Eta horren ostean, betiko moduan, Aramaiotik Arexolara txirringarritza lasterketa egingo dute. Lasterketa bukatu eta gero, *Vermouth* dantza egingo dute,

trikitilariak lagunduta. Arratsaldean, 17:30ean, Arexolatik Arriolarako kalejira izango da, trikitilariekin; eta ordu berean, urteroko briska eta mus txapelketak jokatu dituzte, Arexolako plazan. 19:30ean, berriz, kanpai jotze erakustaldi bitxia egingo dute auzokoek. 22:30ean dantzaldia izango da Inigorekin eta Mentxurekin eta bukatutakoan, txokolate-jana, elkartean. Eta domekan, eguerdian, meza eta dantza saioa egingo dituzte, eta 17:30ean ume-jolasak, pailazoen lagunduta.

BOTEPRONTOAN/ Nikolas Gardoki · Soinu jotzailea

“Erromeriak asko galdu dira; gaur egun, jendeak gura du tabernan musika ozen ipini eta han ibili”

Nikolas Gardoki aski ezaguna da Aramaion eta inguruetan. Batetik, jairik jai ibiltzen delako; bestetik, ezkontzetan sarritan nagusi izaten delako. Jakina, soinua altzoan hartuta. 45 urte-edo eman ditu hala:

Ezkontzetan espezialista zara...

Espezialista-edo; makina bat ezkontza egin ditugu, ez dakit onak edo txarrak garelako-edo... **Gutxienez, martxosoak izan beharko duzue, ezta?** Bai, jo egin behar izaten ditugu pieza *martxosoak*, bai. Geroago eta *martxa* handiagoarekin doa gauza. Lehenagoko piezak estimatu egiten dira, baina ez da horrelakorik ateratzen. Modan daudenak jo behar izaten dira: *Bomba...* Orain, *Haciendo el amor* edo hori ikasi beharko dugu. Eta ez pentsa, soinuarekin horiek ikasteko oso gaitzak dira. Lehengo piezek, akaso, zortzi nota besterik ez zuten, baina eleganteak izaten ziren. Orain, berriz, nota mordoa dituzte, eta azkenean norberak ere ezin du ulertu zer jotzen duen!

Baina lehengo agarrak jotzen jarraitzen duzue?

Egin egiten dira. Baserriko lekuetan gustura egiten ditu jendeak. Batez ere edadekoek. Dena dela, erromeria modukoak



asko galdu dira; gaur egun, jendeak gura du tabernan musika ozen ipini eta han ibili. Gogoratzen naiz orain 35 urte-edo neu bakarrik plaza handi baten mahai zahartxo baten gainean eta plaza beteta, dantzari. Akaso 20 pieza-edo jakingo nituen, eta haiei buelta eta buelta ematen ibilita ere, jendea gustura! Plaza beteta! Orain, nahiz eta talde ona ekarri, ez da plaza betetzen.

1959an egin zenuen aurreneko ezkontza. Akordatzan non?

Bai, Azkoagan. 11:00ak inguruan hasi ginen, kalejira egin genuen elizaraino. Ezkontza baserri baten izan zen; lo ere han lo egin genuen, eta hurrengo egunean denok kalejiran joan ginen kalera, mezetara. Gero, txikiteoa egin genuen.

Horrenbeste urtean zenbat ezkontza egin dituzun kontuan

badaukazu?

4.000 ezkontza-edo egin ditut. Lehen, astean lauzpabost egiten genituen. Ezkontzen agenda gordeta daukat, zenbat kobratzen genuen eta guzti. Pentsa, lehenengoko ezkontzetan hamar duro kobratzen genuen; diru asko zen hori! Eta plazetan ere jotzen genuen. Dena dela, asko igarri da ezkontzea gutxitu egin dela. Askok, gainera, familiakoak egiten dituzte (20-30 lagun).

Bakarrik hasi zinen, baina gero familiakoak laguntzen hasi ziren, ezta?

Bai. Loba bi hartu nituen. Batek 9 urte zituen eta besteak 11 egiteko. Nik 18 urte inguru. Hirurok hasi ginen, eta berritasuna izan zen: uniformearekin... Akordatzan naiz Aramaion egon zen abade batek esaten zidala gaizki erakusten nabilela lobei, publikoan ibiltzeko edaderik ez zeukatela-eta. Plazan bikoteak arrimatuta dantzan ibiltzen zirelako...

Semea ere lagun izan duzue...

Seme nagusienarekin ekin nion, orain 15 bat urte dela-edo. Seme nagusiarekin eta Eskoriatzako Landarekin hasi nintzen. Hamar urte inguruan ibili zen nirekin, eta gero Oñatiko Ugarte hartu nuen, eta hirurok gabiltza.

“Derrigor jo behar izaten da ‘Pakito chocolatero’ kantua; beti eskatzen didate, baita umeek ere”

“Lau bat belaunaldi gabiltza musika jotzen. Eta oraindik badaukat jarraitzeko asmoa”